



VEDTEKER FOR VAKSDAL KOMMUNE SITT FOND FOR VILT, FISKE OG FRILUFTSLIV

§1 Heimel

Heimelen for fondet er Kongeleg resolusjon av 4. mars 1966 om konsesjon til utbygging av Eksingedalsvassdraget – Evanger Kraftverk, samt kongelig resolusjon av 17. juni 1992 om konsesjon til bygging av Åsebotn kraftverk - Nygard pumpekraftverk.

§ 2 Føremål

Fondet skal nyttast til opphjør av vilt, fiske og friluftsliv i Vaksdal kommune, jamfør punkt 14 i konsesjonsvilkåra for Eksingedalsvassdraget, og punkt 12 i konsesjonsvilkåra for Åsebotn kraftverk – Nygard pumpekraftverk.

§ 3 Årlege innskot og grunnkapital

BKK betaler inn årlege fondsmidlar i samsvar med konsesjonsvilkår for reguleringane. Beløpa blir indeksjusterte.

Grunnkapitalen til fondet skal være på kr 250 000,-. Grunnkapitalen skal kvart år tilleggast den delen av årleg avkastning som svarar til auken i konsumprisindeksen.

Saldo ut over grunnkapitalen er frie fondsmidlar som kan delast ut i tråd med vedtektene og mogelege føringar frå fondsstyret.

Årlege innskot og renter av fondskapitalen utgjer avkastninga til fondet.

§ 4 Fondsstyre

Formannskapet i Vaksdal kommune utgjer fondsstyret. Fondsstyret fattar vedtak om årleg tildeling av fondsmidlane. Formannskapet kan delegere vedtaksrett til administrasjonen.

§ 5 Søknadar, tildeling og bruk

SØKNADAR

Grunneigarar, grunneigarlag, interesseorganisasjonar og enkeltpersonar i Vaksdal kommune kan søkje om tilskot. Skriftleg søknad med plan for gjennomføring og budsjett, skal sendast Vaksdal kommune innan 1. desember. Kommunen si handsaming skal gjerast innan utgangen av februar kvart år.

Midlane skal kunngjerast kvart år, minimum på kommunen sine internettsider.

TILDELING

Tildeling av midlar må vere i tråd med føremåla for fondet. Administrasjonen handsamar søknadane og innstiller til politisk vedtak.

Det skal setjast arbeids- og rapporteringsfrist for kvart tiltak. Tildelte midlar som ikkje er brukt i tråd med vilkåra for tildeling, kan trekkjast attende. Det same gjeld for tiltak som ikkje er gjennomført innan arbeidsfristen. Søkjar kan søkje om utsetjing av arbeidsfristen.

Inntil anna er sagt i kommunale strategiar og retningslinjer for fondet, er det ingen prosentvis tilskotsgrense for omsøkte tiltak.

Målet er at bruken av midlane over ein 5-årsperiode, fordelar seg slik:

- *Fisk 50 % - Vilt 25 % - Friluftsliv 25 %.*

Fordelinga mellom føremåla, kan svinge frå år til år. Administrasjonen lager 5-årige oppstillingar over bruken av midlane.

Det kan gjevast tilskot til fleirårige prosjekt etter årleg søknad.

BRUK

Fondsmidlane skal vere til lokal bruk og nytte, med verdi for ålmenta. Kommunen kan bruke fondsmidlar til tiltak innafor føremåla. Frie fondsmidlar kan nyttast til forskottering av kapitalkrevjande tiltak som vert finansiert av offentlege tilskot. Fondsstyret kan lage strategiar og retningslinjer for fondsbruken.

§ 6 Forvaltning

Fondsmidlane skal plasserast på renteberande konto i bank. Fondsstyret ser til at kapitalen gjev ei forsvarleg renteavkastning.

Kommunekasseraren står for rekneskapsføring og utarbeiding av årsoppgåve. Administrasjonen lager årsrapport til fondsstyret.

§ 7 Vedtektsendringar

Vedtekten kan endrast etter vedtak i formannskapet. Vedtektsendringane treng godkjenning av Miljødirektoratet.

Vedtektene er vedtekne av kommunestyret , 19.05.2014, sak 30/2014.
Vedtektene erstattar Direktoratet sitt vedtak i brev av 29. januar 1979.